

Home > JAUFRE RUDEL > EDIZIONE > Quan lo rossinhols el foillos > Tradizione manoscritta > CANZONIERE M<sup>2</sup>(2)

## CANZONIERE M<sup>2</sup>(2)

Testo Careri 1996, p. 396.

<p>Qan le rossinhols el foilhos,          Dona, damor enquer en pren          E mon son chan iauzen ioios          E remira sa par souen          El riu son clar el prat son gen          Per nouell deport qe reinha          Mi uen al cor grandz iois iazen.</p>	<p><b>I.</b>          Qan le rossinhols el foilhos          dona d'amor e-n quer e-n pren,          e mon son chan jauzen joios          e remira sa par soven,          e-l riu son clar e-l prat son gen,          per novell deport qe reinha,          mi ven al cor grandz jois jazen.</p>
<p>Daquest amor sui tan cochos          Qe qant ieu uau uas lei corren          Veiaire mes qa reuersos          Men torne qill sen an fugen          E mos caualls hi uai tan len          Qe greu er qe lai ateinha          Samors no lam fa remaner.</p>	<p><b>II.</b>          D'aquest'amor sui tan cochos          qe, qant ieu vau vas lei corren,          vejaire m'es q'a reversos          m'en torn e q'ill s'en an fugen.          E mos cavalls hi vai tan len,          qe greu er qe lai ateinha          s'Amors no la-m fa remaner.</p>
<p>De tal donna sui desiros          A cui non aus dir mon talen          Anz qant remire sas fazos                                            Totz le cors          Totz le cors men uai esperden          Dieus saurai ia tan dardimen          Qell aus dir qe patz menteinha          Pos dals non llaus merse qerer.</p>	<p><b>III.</b>          De tal donna sui desiros,          a cui non aus dir mon talen;          anz qant remire sas fazos,          totz le cors m'en vai esperden.          Dieus, s'aurai ja tan d'ardimen          qe ll'aus dir qe patz m'en teinha          pos d'als non ll'aus merse qerer?</p>
<p>A qom son siei dich saboros          E siei bon fach fin e ualen          Qanc non nasqet sai entre nos          Tan bella de neguna gen          Cors ha graille delgat plazen          E non cug genzers si seinha          Ni anc homs non la poc uezer.</p>	<p><b>IV.</b>          A! qom son siei dich saboros          e siei bon fach fin e valen:          q'anc non nasqet sai entre nos          tan bella de neguna gen;          cors ha graille, delgat, plazen,          e non cug genzers si seinha,          ni anc homs non la poc vezer.</p>

<p>Amors alegres part de uos  Per so qe uau mo\ n/ miells qeren  E sui en tant auenturos  Qencaras nai mon cor iauzen  La merse de mon bon geren  Quem uol em apellem deinha  E ma tornat en bon esper.</p>	<p><b>V.</b>  Amors, alegres part de vos  per so qe vau mon miells qeren;  e sui en tant auenturos  q'encaras n'ai mon cor jauzen:  la merse de Mon Bon Geren,  que-m vol e m'apell' e-m deinha  e m'a tornat en bon esper.</p>
<p>E qi sai reman delechos  E dieu non sec en bellien  Non sai con sia iamais pros  Ni con si ueinha gerimen  Qieu crei e sai mon escien  Qel cell cui ihu crist seinha  Segura colpa tot tener.</p>	<p><b>VI.</b>  E qi sai reman delechos  e Dieu non sec en Bellien,  non sai con sia ja mais pros  ni con si veinh' a gerimen;  q'ieu crei e sai, mon escien,  qe-l cell cui Ihu Crist seinha  segura colpa tot tener.</p>

- letto 638 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911  
CF 80209930587 PI 02133771002

---

**Source URL:** <https://letteraturaeuropea.let.uniroma1.it/?q=laboratorio/canzoniere-m%CA%B0%C2%B2>